



MALAYSIA

# PENYATA RASMI PARLIMEN

*Parliamentary Debates*

## KAMAR KHAS

*Special Chamber*

**PARLIMEN KEEMPAT BELAS  
PENGAL KETIGA  
MESYUARAT KETIGA**

## K A N D U N G A N

### UCAPAN DI BAWAH USUL BERKENAAN PERKARA TADBIR KERAJAAN [P.M. 17]:

- **Penjelasan Mengenai Status dan Keberkesanan  
Peranan Duta Khas Perdana Menteri  
Bertaraf Menteri kepada Hubungan  
Antarabangsa Malaysia**  
- *YB. Dato' Wira Haji Amiruddin bin Haji Hamzah  
(Kubang Pasu)* (Halaman 1)
- **Temasya SUKMA 2021**  
- *YB. Tuan Sivakumar Varatharaju Naidu  
(Batu Gajah)* (Halaman 4)

**MALAYSIA  
KAMAR KHAS  
PARLIMEN KEEMPAT BELAS  
PENGKAL KETIGA  
MESYUARAT KETIGA**

**Isnin, 23 November 2020**

**Mesyuarat dimulakan pada pukul 12.00 tengah hari**

**DOA**

*[Timbalan Yang di-Pertua (Dato' Sri Azalina Othman Said)  
mempengerusikan Mesyuarat]*

---

**UCAPAN DI BAWAH USUL  
BERKENAAN PERKARA TADBIR KERAJAAN (P.M. 17)**

**Penjelasan Mengenai Status dan Keberkesanan Peranan  
Duta Khas Perdana Menteri Bertaraf Menteri  
kepada Hubungan Antarabangsa Malaysia**

**12.04 tgh.**

**Dato' Wira Haji Amiruddin bin Haji Hamzah [Kubang Pasu]:** Terima kasih Tuan Yang di-Pertua. Setelah perubahan kerajaan pada bulan Februari 2020 yang lalu, kepimpinan Yang Amat Berhormat Pagoh telah menyusun atur semula fungsi dan struktur kementerian Kerajaan Perikatan Nasional.

Penstrukturan semula kementerian dengan meningkatkan jumlah kementerian menambah jawatan Timbalan Menteri dan mewujudkan jawatan-jawatan bertaraf menteri menimbulkan pelbagai persoalan yang menggusarkan pelbagai pihak.

Sedang negara kita mengalami pandemik COVID-19 yang memuncak ini, kita menyaksikan bahawa hal ini gagal menampakkan impak dalam menyelesaikan permasalahan ekonomi khususnya dalam aspek menarik pelabur-pelabur asing ke dalam negara.

Sepertimana yang kita semua maklum pelantikan Duta Khas Perdana Menteri yang jawatannya bertaraf menteri seperti Ahli Parlimen seperti Ahli Parlimen Marang iaitu Duta Khas ke Timur Tengah, Ahli Parlimen Serian iaitu Duta Khas ke Asia Timur dan Ahli Parlimen Bintulu iaitu Duta Khas ke China. Saya kira jawatan seumpama ini wajar untuk kita tahu peranannya secara spesifik supaya ianya tidak menjadi liabiliti buat Malaysia kerana peruntukan elaun dan gaji mereka setaraf dengan menteri. Perkara ini tidak boleh diselindung malah kita memerlukan semak dan imbang.

Tuan Yang di-Pertua, saya mohon pihak Perdana Menteri untuk memberi penjelasan yang konkrit mengenai bidang tugas kerja sebagai Duta Khas Perdana Menteri serta menyenaraikan setiap satu kejayaan dan keberkesanan mereka dalam memberi pulangan hasil kepada sektor ekonomi, pendidikan dan sosial di Malaysia sejak hari pertama Duta Khas Perdana Menteri ini diwujudkan.

Tambahan pula, saya minta kementerian menyatakan adakah duta khas sudah menggerakkan rundingan bagi memperkukuhkan hubungan antara negara berkepentingan seperti negara di Timur Tengah, China dan Asia Timur. Saya juga memohon untuk dimaklumkan apakah hasil daripada rundingan tersebut, jika ada. Sekian, terima kasih.

**Timbalan Yang di-Pertua [Dato' Sri Azalina Othman Said]:** Silakan Yang Berhormat Timbalan Menteri.

**12.06 tgh.**

**Timbalan Menteri di Jabatan Perdana Menteri (Tugas-tugas Khas) [Datin Mastura binti Mohd Yazid]:** Terima kasih Tuan Yang di-Pertua, terima kasih Yang Berhormat. Terlebih dahulu saya mengucapkan terima kasih kepada Yang Berhormat Kubang Pasu sebentar tadi berhubung dengan peranan dan sumbangan serta pencapaian duta-duta khas kepada Yang Amat Berhormat Perdana Menteri dalam hubungan antarabangsa Malaysia.

Untuk maklumat Yang Berhormat, tiga duta khas kepada Yang Amat Berhormat bertaraf Menteri tersebut dilantik bertujuan bagi membantu dan menasihati Yang Amat Berhormat Perdana Menteri dalam hal-hal yang berkaitan dengan negara atau rantau mereka ditugaskan.

Sepertimana sedia maklum, tiga duta khas itu adalah Yang Berhormat Marang sebagai Duta Khas ke Rantau Timur Tengah, Yang Berhormat Bintulu, Duta Khas ke Republik Rakyat China dan Yang Berhormat Serian, Duta Khas ke Asia Timur. Kesemua duta khas kepada Yang Amat Berhormat Perdana Menteri ini diberi tugas dan tanggungjawab untuk meningkatkan hubungan dua hala antara Malaysia dengan negara dari rantau mereka ditempatkan atau ditugaskan.

Ia meliputi antaranya peningkatan dalam hubungan luar, ekonomi, perdagangan, pelaburan serta pendidikan. Bagi Rantau Timur Tengah pula, ia termasuk peningkatan kerjasama dalam bidang Agama Islam. Duta khas ini diberi taraf Menteri sebagai langkah strategik untuk memudahkan mereka apabila berurusan dan mendekati kepimpinan negara di mana mereka ditugaskan atau ditempatkan.

Taraf Menteri ini adalah secara pentadbiran dan tidaklah sama taraf dengan Yang Berhormat Menteri yang dilantik di bawah Perkara 43(2) Perlembagaan Persekutuan.

Amalan melantik duta khas atau penasihat-penasihat kepada Yang Amat Berhormat Perdana Menteri adalah perkara biasa, Yang Berhormat. Yang mana ia turut dilaksanakan oleh pentadbiran-pentadbiran terdahulu mengikut keperluan negara. Dalam hal ini, pelantikan duta khas atau penasihat-penasihat kepada Yang Amat Berhormat Perdana Menteri dibuat atas keperluan strategik bagi membantu dan menasihati Yang Amat Berhormat Perdana Menteri dalam perkara atau tugas yang mereka diamanahkan atau dipertanggungjawabkan.

Individu-individu yang dilantik adalah mereka yang mempunyai jaringan hubungan, pengalaman dan kepakaran tertentu yang boleh memberi faedah kepada usaha-usaha memajukan kepentingan-kepentingan negara.

Tuan Yang di-Pertua, sejak pelantikan mereka, semua duta khas ini telah pun memulakan tugas mereka dengan mengadakan perjumpaan dan perbincangan dengan Kementerian Luar Negeri bagi menyelaraskan tugas dan program yang akan dilaksanakan dengan wakil-wakil kepimpinan negara dan rantau tempat mereka ditugaskan.

Disebabkan pelantikan mereka baharu sahaja beberapa bulan lalu serta dengan penularan wabak COVID-19 di seluruh dunia yang telah menghalang perjalanan terutamanya di peringkat antarabangsa, maka ia telah menjejaskan dan mengehadkan untuk duta-duta khas tersebut menjalankan tugas mereka.

Walau bagaimanapun, di sebalik kekangan perjalanan antarabangsa, duta khas masih menjalankan tugas dan tanggungjawab mereka. Misalnya, mengadakan hubungan dan perbincangan melalui pelbagai kaedah yang ada seperti telefon, e-mel, video dan sebagainya.

Berhubung dengan permintaan Yang Berhormat agar disenaraikan kejayaan-kejayaan yang telah dicapai oleh duta-duta khas, saya berpendapat dalam hubungan luar terutamanya dalam menarik pelaburan dan peningkatan ekonomi misalnya, ia merupakan usaha berterusan serta mengambil masa untuk dilihat hasilnya.

Oleh itu, berikanlah sedikit masa lagi Yang Berhormat dan dengan harapan wabak COVID-19 juga akan segera berakhir. Maka saya yakin, *insya-Allah* pelantikan duta-duta khas kepada Yang Amat Berhormat Perdana Menteri ini akan memberikan faedah dan manfaat kepada negara dan rakyat keseluruhannya.

Untuk makluman Yang Berhormat, duta khas kepada Yang Amat Berhormat Perdana Menteri bertanggungjawab untuk memberikan laporan dan/atau nasihat kepada Yang Amat Berhormat Perdana Menteri dan adalah menjadi budi bicara Yang Amat Berhormat Perdana Menteri dalam menilai dan menerima laporan dan nasihat daripada duta-duta khas tersebut.

Sebelum saya akhiri ucapan saya ini, saya sekali lagi mengucapkan terima kasih di atas keprihatinan Yang Berhormat Kubang Pasu berhubung dengan pelantikan duta khas kepada Yang Amat Berhormat Perdana Menteri serta yang mahukan pelantikan tersebut membawa manfaat sepenuhnya kepada rakyat dan negara. Sebenarnya, perkara yang sama jugalah menjadi matlamat kerajaan melalui pelantikan duta-duta khas berkenaan. Terima kasih Tuan Yang di-Pertua.

■1210

### **Temasya SUKMA 2021**

#### **12.10 tgh.**

**Tuan Sivakumar Varatharaju Naidu [Batu Gajah]:** Terima kasih Tuan Yang di-Pertua. Terima kasih juga saya ucapkan kepada Menteri Belia dan Sukan kerana sudi datang untuk menjawab soalan saya berkaitan dengan SUKMA 2021. Tuan Yang di-Pertua, Kementerian Belia dan Sukan telah mengumumkan bahawa SUKMA yang bakal diadakan pada tahun 2021 di Johor telah dibatalkan.

Sehubungan dengan itu, terdapat pelbagai reaksi daripada para penganjur, atlet-atlet sukan dan persatuan sukan yang terlibat dalam temasya tersebut. Walaupun pengumuman ini adalah atas dasar prihatin untuk mengawal penularan wabak COVID-19, namun ini telah mengakibatkan pelbagai permasalahan yang terpaksa dihadapi.

Pertama sekali, persatuan-persatuan sukan telah pun membuat persediaan awal dengan perbelanjaan yang signifikan. Majlis-majlis Sukan Negeri juga telah mengatur langkah persediaan ke arah temasya tersebut. Semua ini melibatkan perbelanjaan yang besar. Setakat ini, berapakah jumlah wang yang telah dibelanjakan untuk temasya tersebut?

Pada masa yang sama, para atlet juga telah membuat persediaan daripada segi latihan dan pembelian peralatan sukan yang diperlukan. Mereka juga telah berkorban masa untuk menghadapi SUKMA 2021. Semuanya telah menjadi sia-sia apabila pembatalan tersebut diumumkan oleh pihak Kementerian Belia dan Sukan. Para atlet juga akan hilang motivasi kerana telah

ternanti-nati dengan penuh semangat. Bagaimanakah kerajaan akan menangani isu ini? Ramai yang akan putus asa dan terus berhenti untuk berlatih.

Selain daripada itu, Kementerian Belia dan Sukan juga perlu menyelesaikan isu had umur atlet bagi SUKMA 2022. Atlet-atlet yang mencapai umur lebih daripada 21 tahun pada tahun 2022 tidak akan berpeluang untuk mengambil bahagian jika syarat ini tidak dipinda. Adakah kerajaan mempunyai cadangan untuk mengkaji semula pelaksanaan SUKMA 2021 dengan SOP yang berlainan dan dengan syarat-syarat yang lebih ketat supaya temasya ini tidak dibatalkan sepenuhnya? Sekian, terima kasih.

**Timbalan Yang di-Pertua [Dato' Sri Azalina Othman Said]:** Silakan Yang Berhormat Menteri.

### 12.13 tgh.

**Menteri Belia dan Sukan [Dato' Sri Reezal Merican bin Naina Merican]:** *Bismillahir Rahmanir Rahim. Assalamualaikum warahmatullahi wabarakatuh* dan salam sejahtera. Tuan Yang di-Pertua, yang pertama sekali terima kasih kepada rakan saya, Yang Berhormat dari Batu Gajah yang bertanyakan soalan berkaitan dengan pembatalan penganjuran SUKMA.

Untuk makluman Ahli Yang Berhormat, SUKMA XX Johor 2020 yang sepatutnya dianjurkan pada 2 hingga 10 April 2021 manakala Sukan Para SUKMA yang dijadualkan 8 sehingga 13 Mac 2021 telah dibatal dan ditangguhkan penganjurannya ke tahun 2022.

Keputusan penangguhan temasya ini telah dibincangkan secara bersama dalam Mesyuarat Khas Jawatankuasa Tertinggi SUKMA pada 9 November 2020 yang turut dihadiri oleh semua Exco Kerajaan Negeri yang mewakili portfolio belia dan sukan, Majlis Olimpik Malaysia dan Majlis Paralimpik Malaysia dan telah pun dipersetujui secara sebulat suara agar SUKMA dan Para SUKMA bagi tahun 2020 dibatalkan dan ditangguhkan ke tahun 2022. Untuk maklumat Ahli Yang Berhormat, pembatalan dan penangguhan ini adalah berasaskan kepada beberapa faktor yang seperti berikut:

- (i) ketidaktentuan dalam penularan wabak pandemik COVID-19 yang telah pun memasuki gelombang ketiga yang melanda negara pada waktu ini;
- (ii) pertindihan tarikh awal dan banyak perubahan kalendar terutamanya berkaitan tarikh baharu peperiksaan Sijil Pelajaran Malaysia dan Sijil Tinggi Pelajaran Malaysia

yang telah diubah oleh Kementerian Pendidikan Malaysia. Sebagai makluman, seramai hampir 20 peratus atlet daripada jumlah keseluruhan penyertaan temasya SUKMA dan Para SUKMA dijangka terlibat dalam peperiksaan SPM dan STPM. Jumlah itu adalah lebih kurang 1,600 orang atlet;

- (iii) kalendar beberapa temasya sukan tempatan dan antarabangsa pada 2021 juga terlalu rapat dengan beberapa tarikh penting seperti Ramadhan pada 12 Mei atau 13 Mei, Kejohanan Bola Sepak Euro, Sukan Olimpik Tokyo 2020, Sukan Paralimpik Tokyo, Sukan SEA Vietnam 2021 dan Sukan Para SEA Vietnam 2021 pada Disember;
- (iv) kesukaran tuan rumah negeri iaitu Johor sendiri untuk menyediakan jaminan keselamatan, kesihatan kepada hampir 30,000 orang yang akan terlibat nanti. Baik atlet, jurulatih, pegawai, sukarelawan, pengurusan dan mereka yang terlibat yang lainnya. Tambahan pula, terdapat negeri-negeri yang telah pun menunjukkan reaksi bahawa agak sukar untuk mereka menyertai seperti negeri Sabah dan beberapa negeri yang mengalami Perintah Kawalan Pergerakan Bersyarat seakan-akan total *lockdown* untuk tempoh yang agak lama;
- (v) peningkatan kos pengurusan tuan rumah negeri Johor akibat beberapa penangguhan sebelum ini.

Untuk maklumat Yang Berhormat dan untuk maklumat Dewan yang mulia ini, anggaran kos keseluruhan penganjuran Sukan Malaysia SUKMA adalah sebanyak RM617.9 juta. Kos perbelanjaan fizikal bagi 39 tempat pertandingan adalah sebanyak RM467.9 juta di mana RM142 juta adalah peruntukan Kerajaan Persekutuan manakala RM325 juta adalah daripada Kerajaan Negeri Johor.

Manakala perbelanjaan operasi dianggarkan sebanyak RM150 juta dan sejumlah RM65 juta daripada jumlah tersebut adalah daripada Kerajaan Persekutuan. Dalam lain perkataan, implikasi kewangan keseluruhan Kerajaan Persekutuan adalah berjumlah RM200 juta berbanding dengan RM410 juta yang dilaburkan oleh tuan rumah iaitu negeri Johor.

Untuk makluman juga, SUKMA dan Para SUKMA ini telah ditawarkan semula kepada negeri Johor untuk meneruskan penganjuran pada tahun 2022 ekoran ketahapsediaan negeri Johor untuk menganjurkan pada tahun ini telah



mencapai hampir 100 peratus dan selebihnya adalah disebabkan di samping pelaburan kerajaan negeri yang begitu besar untuk SUKMA 2020.

Sebagaimana yang semua sedia maklum bahawa kaedah penggiliran penganjuran SUKMA juga telah diubah modelnya daripada dwitahunan menjadi dwitahunan berselang seli dengan tuan rumah dianjurkan oleh KBS dan juga oleh MSN.

Bererti, setiap dua tahun pergi ke negeri dan dua tahun berikutnya kembali ke *Klang Valley* dan dua tahun berikutnya kembali kepada negeri. Berbeza daripada kaedah yang lalu. Ini bererti negeri Kelantan yang pada awalnya patut menjadi negeri yang menganjurkan SUKMA untuk kali pertama pada tahun 2024 hanya akan mendapat hak penganjuran pada tahun 2026.

Jawatankuasa Tertinggi SUKMA juga turut mengambil maklum mengenai persediaan awal atlet-atlet negeri bawah 21 tahun sebelum ini dan telah memutuskan supaya pertimbangan khusus akan dipertimbangkan dalam Mesyuarat Jawatankuasa Teknikal SUKMA bagi memastikan peluang mereka untuk bertanding dengan mengambil kira kepada persediaan atlet negeri yang telah dilakukan sebelum ini termasuk pelaburan yang disebutkan oleh Yang Berhormat tadi.

Pembatalan dan penangguhan temasya ini dapat membantu kerajaan bukan sahaja pihak penganjur malahan kepada negeri-negeri untuk membuat persiapan secara lebih terancang bagi penyertaan mereka ke temasya SUKMA dan Para SUKMA yang akan datang. Terima kasih Tuan Yang di-Pertua.

**Timbalan Yang di-Pertua [Dato' Sri Azalina Othman Said]:** Terima kasih Yang Berhormat Menteri sebab masih letak Johor dalam ingatan. Ahli-ahli Yang Berhormat, dengan itu tamatlah sesi ucapan di bawah Usul Berkenaan Perkara Tadbir Kerajaan mengikut Peraturan Mesyuarat 17 pada hari ini.

Ahli-ahli Yang Berhormat, Mesyuarat Kamar Khas hari ini ditangguhkan sehingga jam 12.00 tengah hari pada hari Selasa, 24 November 2020.

***[Kamar Khas ditangguhkan pada pukul 12.20 tengah hari]***